



Zakaria (kiri) dan Alias berharap nasib golongan nelayan terus dibela.

Nelayan mohon perbanyak tukun tiruan

DUNGUN - Unjam-unjam yang dilabuhkan di beberapa lokasi di dasar laut di perairan Paka membantu memudahkan golongan nelayan menangkap hasil laut termasuk ketika musim tengkujuh, namun ia masih tidak memadai.

Sebanyak 40 unit unjam yang dilabuhkan pada September lalu tidak mampu bertahan lama menyebabkan nelayan terpaksa menurunkan unjam-unjam baharu.

Bagaimanapun, bagi menjana pendapatan lebih baik, golongan nelayan berharap kerajaan memperbanyakkan tukun tiruan kerana langkah itu lebih menguntungkan mereka.

Nelayan, Zakaria Embong, 60, berkata, unjam yang ada membolehkan nelayan terus ke laut walaupun ketika musim tengkujuh.

Namun katanya, ia tidak mampu bertahan lama dan akan mereput.

"Unjam yang diturunkan hasil bantuan Jabatan Perikanan juga dikongsi bersama tetapi lebih baik sekiranya diletakkan tukun tiruan.

"Kosnya agak mahal tetapi lebih menguntungkan dan meningkatkan sumber pendapatan.

"Ketika musim tengkujuh jika tiada unjam atau tukun, lagi susah untuk nelayan mencari rezeki," katanya.

Seorang lagi nelayan, Alias Ahmad, 61, berkata, bantuan berterusan daripada kerajaan amat diperlukan bagi memastikan nasib mereka terus terbela.

"Kita berterima kasih di atas bantuan sebelum ini tetapi kita berharap bantuan yang diberikan berterusan. Terutama ketika musim tengkujuh kerana ketika itu pendapatan kami merosot teruk.

"Kos untuk membuat unjam juga bukannya murah dan jika ada tukun tiruan ia lebih memudahkan," katanya.